



/ Vijesti / BiH



Dr. Vanis u Bahreinu

USPJESI Vrsni sarajevski ljekar na čelu jedne od najvećih bolnica na Bliskom istoku

Dr. Vanis, nakon što je napustio KCUS, postao direktor prestižne klinike, dok Bakir tvrdi da je Sebija otjerala "lopove i lijenčine"

Prije dvije i po godine napustio je Klinički centar Univerziteta u Sarajevu (KCUS), prošle sedmice imenovan je za medicinskog direktora u „Middle East Hospitala“ u Bahreinu. Riječ je o jednoj od najvećih bolnica na Bliskom istoku

Autor: A. NUHANOVIĆ
26.11.2018 14:17

A A A

f t w e 538

f
t
w
e
538

Vrsni ljekar i profesor Nenad Vanis, gastroenterolog koji je prije dvije i po godine napustio Klinički centar Univerziteta u Sarajevu (KCUS), prošle sedmice imenovan je na poziciju medicinskog direktora „Middle East Hospitala“ u Bahrainu. Riječ je o jednoj od najvećih bolnica na Bliskom istoku.

Prepoznat rad

- Dvije i po godine radim u Bahrainu i tačno je da sam prošle sedmice imenovan na poziciju medicinskog direktora u velikoj korporaciji „Middle East Hospital“, u sklopu koje je pet velikih bolnica. Na tu poziciju došao sam, vjerovatno, zahvaljujući radu, trudu i znanju, jer ovdje nema nepotizma, partijskog zapošljavanja i posla “preko veze”. Za mene je to veliki uspjeh, jer sam ovdje ipak stranac, a stranac je uvijek stranac u svakoj zemlji, znate kako to ide. Zato je ovo priznanje i imenovanje za mene još veće - potvrdio je u telefonskoj izjavi iz Bahraina za „Avaz“.

Dr. Vanis je u ovu otočnu državu na jugozapadu Azije otišao sa suprugom, dr. Selmom, koja je na KCUS-u bila jedini subspecijalista dječije anestezije.

- U ovoj bolnici gdje su me unaprijedili radim već godinu i po. Prethodno sam godinu bio u drugoj bolnici. Radim kao senior konsultant gastroenterologije i to je najviša titula s kojom možete da radite ovdje. Napokon su moj rad, trud i znanje negdje drugo prepoznati, što me dodatno ohrabruje i motivira - kaže dr. Vanis.

U riječima da je njegov rad „konačno negdje prepoznat“ osjeti se na šta dr. Vanis misli pa smo ga otvoreno upitali je li se to na neki način referira na činjenicu da je on samo jedan od onih 80 stručnjaka koji su rastjerani s KCUS-a otkako je na čelo tog kliničkog centra došla Sebija Izetbegović.

U teškim diskvalifikacijama onih koji su pod njenim pritiskom odlazili s KCUS-a, ali i iz države, nazivajući ih „neradnicima“, imala je i direktnu stranačku podršku svog supruga, dojučerašnjeg člana Predsjedništva BiH i aktuelnog predsjednika SDA Bakira Izetbegovića. Iako živi daleko od domovine, nije ni dr. Vanisu promakao ostrašćeni Izetbegovićev govor od 5. oktobra ove godine na završnom predizbornom skupu SDA u Zetri, kada je supruzi Sebiji „odao priznanje i čestitao na hrabrosti“.

- Čestitam ti, Sebija, i čestitam tvome timu, koji većinom čine žene, hrabre, odane, posvećene žene. Rastjerali ste lopove i lijenčine, vratili nagomilane dugove, vratili poštovanje, humanost i profesionalan odnos prema pacijentu - poručio je pred TV kamerama Bakir Izetbegović.

Ratno iskustvo

S druge strane, dr. Vanis odgovara kako on nije otjeran, nego je sam dao otkaz, te je sa suprugom želio stručnost i znanje dokazati negdje drugo.

- Naravno da me vrijeđa to što se svi doktori koji su otišli s KCUS-a stavljaju u jedan koš. I ja sam u toj skupini od 80 ljudi koji su otišli s KCUS-a. Taj ko je rekao, ko misli tako, neka misli. Naši doktori koji su ostali i koji su otišli iz KCUS-a su najbolji doktori, to se, evo, pokazalo na mom primjeru, ali i na mnogim drugim. Ko dobro radi, njegov se rad i znanje prepoznaju i isplate. To niko nikad neće moći osporiti - poručuje dr. Vanis.

Pojašnjava i da u Bahrainu ukupno živi 20 državljana BiH.

- Malo je Bosanaca ovdje, a od nas 20, troje radimo kao ljekari, dr. Alden Precić, urolog, moja supruga i ja. Najvažnije mi je da se iskustvo i znanje prepoznaju. Ja imam i četverogodišnje ratno iskustvo u Armiji RBiH na koje sam izuzetno ponosan. I, eto, sve dođe na svoje - zaključuje dr. Vanis.



(U videoprilogu podsjećanje na govor Bakira Izetbegovića od 5. oktobra 2018. godine na završnom predizbornom skupu ove stranke u Zetri)

Sarajevo mi nedostaje, KCUS ne

Dr. Vanis priznaje da dolazi u Sarajevo, koje mu mnogo nedostaje.

- Dođem, obiđem porodicu, svoje prijatelje, pogledam utakmicu svog FK Sarajevo, ali nisam svraćao na KCUS. Sarajevo mi nedostaje, ali Klinički centar nikako. Hoću li se vratiti u BiH, vidjet ću, za sada sam ovdje - kaže nam dr. Vanis.

Pacijenti me traže iako sam otišao

Na pitanje je li ga direktorica Izetbegović, nakon što je napustio KCUS, ikada kontaktirala, dr. Vanis kaže:

- Nije nikad. Niti će. Nije to njen posao da me kontaktira. Ali jesu me kontaktirali moji pacijenti. Traže me iako sam otišao. Uputim ih na svoje kolege kojima vjerujem. Ostao sam, također, u kontaktu sa svim kolegama iz KCUS-a.



Više o: [Nenad Vanis](#) | [Sebija Izetbegović](#)